

Juã ojamu'tãca pũrĩ ni'i

A'ti pũrĩ a'tiro weero ojano'pã nise ni'i

Ãrĩ judío masũ Zebedeo macũ Santiago acabiji nicu niwĩ.

A'tere ojacu niwĩ. Jesucristore ãjõpeorãrẽ nisoose me'rã bu'erãrẽ tu'omasĩdutigu ojacu niwĩ. Tojo nicã Jesucristore ãjõpeonu'cũdutigu, queoro weenu'cũdutigu ojacu niwĩ. Ma'ise pe'ere apeye yu'ruoro weenu'cũdutigu ojacu niwĩ.

Cũta ape pũrĩ Jesucristo catiri umuco cjasere ojacu niwĩ.

Jesucristo ye queti ni'i

¹⁻² Yu'u musãrẽ Jesucristo ye cjasere, cũ nise-tisere ojacu wee'e. A'tiro ni'i. A'ti turi weese duporo cũ, cũ pacu me'rã nitojacu niwĩ. Be'ro a'ti turipure bajuacu niwĩ. Cũ catinu'cũgũ marĩrẽ catinu'cũcã weegũ nimi. Ësã cãrẽ ã'awũ. Cũ ucũsere tu'owu. Ësã basu warota cãrẽ ã'abutiawu. Cãrẽ añurõ masĩwũ. Tojo weerã cãrẽ ã'a'quere musãrẽ were'e. ³ Ësã marĩ pacu Õ'acũ me'rã, tojo nicã cũ macũ Jesucristo me'rã añurõ nicã'a. Musã quẽ'rãrẽ tojota uasãsa'a. Tojo weerã ãsã ã'a'quere, tu'o'quere musãrẽ were'e. ⁴ Musãrẽ añurõ e'catiato nígũ a'ti pũrĩrẽ oja'a.

Õ'acũ añugũ nimi nise queti ni'i

⁵ Jesucristo ãsãrẽ bu'e'quere musãrẽ were-turia'a. Cũ a'tiro niwĩ: “Õ'acũ añugũ nimi. Cũpure ne ña'ase marĩ'i. Cũ sĩ'ose weronojõ nimi. Na'itĩ'ase weronojõ nitimi”, niwĩ. ⁶ Marĩ a'tiro nibosa'a: “Õ'acũ me'rã añurõ nicã'a”, nibosa'a. Tojo nimirã ña'arõ wéérã, nisoorã weesa'a. Marĩ weesetise, marĩ ye ucũse useri me'rã tojo weesa'a. ⁷ Õ'acũ añurõ weemi. Marĩ Õ'acũ weronojõ añurõ wéérã pũrĩcã, ãpẽrã me'rã añurõ nisetimasĩ'i. Cũ macũ Jesucristo wẽrĩse me'rã nipe'tise marĩ ña'arõ nisetisere ducayunu'cũmi.

⁸ Marĩ ña'ase cuomirã ña'ase moo'o nĩrã, marĩ basuta nisoorã wee'e. Marĩ wãcũse diacjũ niwe'e. ⁹ Õ'acũ queoro weenu'cũgũ marĩ ña'arõ wee'quere diacjũ wereyu'rucã, queorota marĩrẽ acobojogusami. Nipe'tise marĩ ña'arõ weeseti'quere coepe'ocũsami. ¹⁰ Õ'acũ a'tiro nicu niwĩ: “Masã nipe'tirã ña'arã nima”, nicu niwĩ. “Marĩ ña'arõ weewe'e” nĩrã, “Õ'acũ nisoosepijagu nimi”, nĩrã weebosa'a. Cũ ucũsere ejõpeotirã weronojõ nibosa'a.

2

Õ'acũ me'rã nĩrã a'tiro weeya nise ni'i

¹ Musã yu'u põ'rã weronojõ ni'i. Ña'ase weeticã'to nígũ, musãrẽ a'tere oja'a. Marĩ ña'arõ weecãma, Jesucristo cũ pacupure marĩrẽ ucũbosasami. “Narẽ acobojoya”, nisami. Jesucristo ña'ase moogũ nimi. Tojo weegu cũ marĩrẽ sẽrĩbosamasĩsami. ² Jesucristo wẽrĩse me'rã marĩ ña'arõ wee'quere acobojose bocacãrã niwũ.

Marĩ dia'cũ acoboJose bocamasĩtisa'a. Nipe'tirã a'ti turicjãrã acoboJose bocamasĩsama.

³ Marĩ masĩ'i, Õ'acũ dutisere weérã, cūrẽ ĩ'awã'no'sa'a. ⁴ Marĩ a'tiro nibosa'a: “Õ'acũrẽ masĩ'i.” Tojo nimirã cũ dutisere weetirã, nisoosepijarã nibosa'a. ⁵ Cũ dutiro weérã, Õ'acũrẽ queorota ějõpeosa'a. Tojo weerã marĩ Õ'acũ me'rã ni'i nisere masĩ'i. ⁶ “Marĩ Õ'acũ me'rã ni'i” nĩrã, Jesucristo weeseti'caronojõta weesiruturoũa'a.

A'merĩ ma'ĩna nise queti ni'i

⁷ Acawererã, yũ'u musãrẽ ojase apeye ma'ma dutise mejẽta ni'i. Toduporopũ musã dutise cuo'quereta oja'a. A'te musã tu'o'quepu ni'i. ⁸ Tojo nimirõ, yũ'u musãrẽ ojase ma'ma dutise weronojõ wa'a'a. A'merĩ ma'isere wãmepeogu wee'e. Toduporopũ marĩ a'merĩ ma'itirã, ña'arã niwũ. Na'itĩ'arõpu nĩrã weronojõ niwũ. Ni'cãrõacãrẽ a'te du'uno'rõ wee'e. A'tocaterore marĩ a'merĩ ma'irã, bo'reyuropũ nĩrã weronojõ ni'i. Te a'merĩ ma'isere Jesucristo me'rã masĩno'o. Tojo nicã musã me'rã masĩno'o.

⁹ Marĩ a'tiro nibosa'a: “Yũ'u pũrĩcã añurõ Õ'acũ dutiro weenu'cũcã'a.” Tojo nimigũ ãpẽrãrẽ ma'itigũ, toduporopũ na'itĩ'arõpu nĩ'caro weronojõta nicã'sa'a tja. ¹⁰ ãpẽrãrẽ ma'ígũ, bo'reyuropũ nigũ weronojõ nimi. Ne cūrẽ cã'rõacã ña'arõ weese marĩ'i. ¹¹ Marĩ ãpẽrãrẽ ma'itirã, na'itĩ'arõpu nĩrã weronojõ nisetisa'a. Marĩ ña'arõ weese bu'iri caperi bajuno'tirã weronojõ nisa'a. Tojo weerã “A'tiro pe'e ũa'a”, nĩmasĩtisa'a.

12-14 Yu'u musã nipe'tirãrẽ ojaguti. Jesucristo cû wẽrĩse wapa Õ'acũ musã ña'arõ wee'quere acobojocu niwĩ. Musã Õ'acũrẽ mas'i. Bucurã, musãrẽ oja'a. Jesucristore ne waropu du'pocãti'cure ejõpeoyucã, oja'a. Ma'mapjia, musã wãcũtutuarã ni'i. Õ'acũ ye ucũsere tu'o ejõpeo'o. Wãtĩrẽ docaque'acã weecãrã niwũ. Tojo weegu musãrẽ oja'a.

15-16 A'ti umuco cjase Õ'acũ ye mejẽta ni'i. A'tere wãcũnurãticã'ña. Ña'arõ wãcũse, a'metãrãsĩ'rĩse, uaripejase, apẽrã yu'ruoro nicã'gũ nisĩ'rĩse ña'a ni'i. A'te nipe'tise a'ti umuco cjase ni'i. "Tere weerãti", niticã'ña. No'o a'tere weesĩ'rĩgũnojõ marĩ pacu Õ'acũrẽ ma'itisami. 17 A'ti turi pe'tiwã'cãrõ wee'e. Nipe'tise ña'arõ weesĩ'rĩ uaripejase quẽ'rã pe'tia wa'arosa'a. Õ'acũ dutiro weerã pũrĩcã ne pe'titirãsama. Cũ tiropu ninu'cũcã'rãsama.

Nisoorã ye queti ni'i

18 Nisoori masã ye quetire wereguti. A'ti umuco pe'tiro wee'e. A'ti turi pe'tise duporo ni'cũ Jesucristore i'atu'tigu a'tigusami. Musã a'tere tu'otojacãrã niwũ. Pãjãrã cũ weronojõ nirã nitojama. Tojo weerã marĩ a'ti turi maata pe'tiatjere mas'i. 19 Na cũrẽ i'atu'tirã marĩ me'rãcjãrãta nicã'miwã. Be'ro, na Jesucristo ye quetire ejõpeotirã, marĩrẽ ducawatia wa'awã. Na marĩ me'rãcjãrã waro mejẽta ní'cãrã niwã. Marĩ me'rãcjãrã nĩrã pũrĩcã, marĩ me'rãta nibosama. Na tojo ducawaticã i'arã, marĩ narẽ i'amasĩ'i. Marĩ me'rãcjãrã mejẽta nicãrã niwã.

²⁰ Jesucristo musārē Espíritu Santure o'ócū niwĩ. Tojo weerā musā diacjã cjase, Jesucristo ye quetire masĩpe'ticã'sa'a. ²¹ Cũ ye quetire masĩtirārē ojagu weewe'e. Musā Jesucristo yere queoro masĩsa'a. Tojo weegũ musārē oja'a. Musā masĩ'i, cũ ye queti nisoose mejēta ni'i.

²² Nisoosepijagu a'tiro nisami: “Jesú Ō'acũ bese'cũ mejēta nimi”, nisami. Tojo busugu cūrē ĩ'atu'tiri masũ nimi. Marĩ pacũ Ō'acūrē, cũ macũ Jesucristore teesami. ²³ No'o cũ macũ Jesucristore uatirã, cũ pacũ quērārē moosama. Marĩ Jesucristore Ō'acũ bese'cũ nimi nĩrã, Ō'acũ pō'rã ni'i. ²⁴ Tojo weerā musā ne waro tu'o'que Jesucristo ye quetire wãcũnũrũña. Musā cũ ye quetire ějõpeonu'cũrã, Ō'acũ me'rã, cũ macũ Jesucristo me'rã añurõ nicã'rãsa'a. ²⁵ Jesucristo marĩrē a'tiro nicũ niwĩ: “Cat-inu'cũatjere o'oguti”, nicũ niwĩ.

²⁶ Musārē nisoori masā ye quetire ojato-japũ. ²⁷ Musā Espíritu Santu Jesucristo o'ó'cũre cũotoja'a. Cũ basu nipe'tisere nisooro marĩrõ musārē bu'emi. “Ŭsārē ãpērã bu'eato”, nitisa'a. Cũ bu'eronojõta Jesucristo me'rã añurõ nicã'ña.

²⁸ Ni'cãrõacã quērārē cũ me'rã ninu'cũcã'ña. Marĩ tojo wéerã, cũ a'ti nucũcãpũ a'ticã, cūrē põtērĩrã ĩ'aucuasome. Bopoyasome. ²⁹ Musā Jesucristo añurõ weesere masĩtoja'a. Tojo weerā nipe'tirã añurõ weerã Ō'acũ pō'rã nima nisere masĩno'o.

Õ'acũ pō'rā weesetise ni'i

¹ Ī'arē mūsā Õ'acũ marĩ pacu marĩrē ma'isere. Marĩrē ma'ígũ, “Yũ'u pō'rā” ni ějōpeosami. Tojo nírōnojōta marĩ cũ pō'rā ni'i. Āpērā a'ti turicjārā Õ'acũrē masītitiārā, marĩ cũrē ějōpeorā weesetisere masītisama. ² Acawererā, marĩ Õ'acũ pō'rā nitoja'a. Cũ pō'rā nimirā, be'ropu marĩ de'ro wa'atjere añurō masĩno'ña marĩ'i yujupu. A'te dia'cũrē masĩ'i. Marĩ Jesucristo a'ticā, cũ bajusere ĩ'arāsa'a. Cũrē ĩ'arā, cũ weronojō wa'arāsa'a. ³ Jesucristore ne ña'ase marĩ'i. Marĩ quē'rā cũ weronojō añurā wa'arāsa'a niatjere wācũ'u. Tojo weerā marĩ ña'arō weeseti'quere ducayuwā'cārā wee'e.

⁴ Ña'arō weesetise Õ'acũ duti'quere yu'rũnucāse ni'i. Nipe'tirā ña'arō weerā Õ'acũrē yu'rũnucārā weema. ⁵ Mūsā masĩtoja'a, marĩ ña'arō wee'quere cō'agũ Jesucristo a'ti nucũcāpũre a'ticu niwĩ. Ne cũrē cā'rōacā ña'ase marĩ'i. ⁶ Tojo weerā nipe'tirā cũ me'rā ninu'cūrā ña'arō weesetitisama. Ña'arō weerā pe'e Jesucristore masītisama. ⁷ Mūsā tu'omasĩña. Āpērā mūsārē maasoocā, ějōpeoticā'ña. Jesucristo añugũ nimi. Tojo weerā cũ weronojō nirā masā añurā nima. ⁸ Wātĩ ne waroputa ña'agũ nimujāti'cu nimi. Tojo weerā ña'arō weesetirā cũ yarā nima. Jesucristo Õ'acũ macũ wātĩ ña'arō weesere cō'agũ a'tigu a'ti turipũre a'ticu niwĩ.

⁹ Õ'acũ cũ pō'rārē cũ weronojō niseticā weecu niwĩ. Tojo weerā Õ'acũ pō'rā ña'asere

weenu'cūtima. ¹⁰ Marĩ Ō'acũ pō'rārē, wātĩ yarārē a'tiro ĩ'aducawaamasĩ'i. No'o āpērārē ma'itirā, ña'arō weesetirārē “Wātĩ yarā nima”, ni'i. Āpērārē ma'irā añurō weesetirā pe'ere “Ō'acũ pō'rā nima”, ni'i.

A'merĩ ma'idutise ni'i

¹¹ A'merĩ ma'irōua'a nise queti musā ne waro maata tu'o'que ni'i. ¹² Dūporocjūpu Caĩ wāmetigu weronojō niticā'rā. Cũ wātĩ yagu nīgũ, cũ acabiji Abere wējēcũ niwĩ. ¿De'ro weegu cūrē wējēpari? Caĩ cũ weesetise ña'ase nicaro niwũ. Cũ acabiji weese pe'e añuse nicaro niwũ. Te bu'iri cūrē uogu, wējēcũ niwĩ. ¹³ Āpērā musā añurō weesetisere ĩ'áuorā, ĩ'atu'tibosama. Na Caĩ cũ acabijire uo'caro weronojō weerā weesama. Na musārē ĩ'atu'ticā, ucuatīcā'ña.

¹⁴ Marĩ āpērārē ma'irā, Ō'acũ pō'rā ni'i nisere masĩ'i. Todūporopure Jesucristore masĩitjīārā, āpērārē ma'itiwũ. Ni'cārōacārē cūrē ějōpeoyurā, a'merĩ ma'i'i. Āpērārē ma'itirā pūrīcā, marĩ todūporopu ní'caronojōta nicā'bosa'a. Catinu'cūsere moobosa'a. ¹⁵ No'o āpērārē ĩ'atu'tiganojō masārē wējēcō'arĩ masũ weronojō nimi. Musā masĩ'i, ne ni'cũ masārē wējēcō'arĩ masũ catinu'cūsere moosami. Musā cũ weronojō niticā'ña. ¹⁶ Jesucristo marĩ ye niatjere wērīcũ niwĩ. Tojo weerā marĩ a'merĩ ma'isere masĩ'i. No'o āpērārē ma'irā, marĩ ya catiri umucore wācūnūrūtisa'a. Narē weetamurā, marĩ quē'rā wērīmasĩ'i. ¹⁷ Marĩ apeyenojō cuomirā, pajasecuorārē o'otirā, ¿de'ro wee “Ō'acūrē ma'i'i”, nibosaũ? ¹⁸ Bu'i,

marĩ ye ucũse ɯseri me'rã dia'cũ “Narẽ ma'i'i”,
niticã'rõɯa'a. Narẽ añurõ weetamurõɯa'a. Te
me'rã marĩ narẽ ma'isere i'omasĩ'i.

Õ'acũrẽ ẽjõpeorã uiro marĩrõ nímasĩ'i nise ni'i

¹⁹⁻²⁰ Apetero marĩ a'tiro wãcũsa'a: “Yɯ'ɯ
ña'ayɯ'ruagu nisa'a.” Tojo wãcũmirã, marĩ
ãpẽrãrẽ ma'írã, Õ'acũ me'rã uiro marĩrõ
nímasĩ'i. Marĩ cũ põ'rã ni'i. Cũ marĩ wãcũsere
masĩpe'ocã'sami. Cũ marĩ ña'arõ wee'quere
acobojosami. ²¹⁻²² Marĩ ne bu'iri moosa'a ni
tu'oña'rã, uise marĩrõ Õ'acũrẽ sẽrĩmasĩ'i. Cũ
dutisere, cũ ɯasere weecã, Õ'acũ nipe'tise marĩ
sẽrĩsere yu'tigusami. ²³ Cũ duti'que a'te ni'i.
Cũ macũ Jesucristore ẽjõpeodutimi. Tojo nicã
cũ duti'caronojõta marĩrẽ a'merĩ ma'idutimi.
²⁴ Marĩ cũ duti'quere wéerã, cũ me'rã añurõ
nicã'a. Cũ quẽ'rã marĩ me'rã añurõ nicã'mi.
Marĩrẽ Espíritu Santure o'ocɯ niwĩ. Tojo weerã
cũ marĩ me'rã nisere masĩ'i.

4

Ãpẽrã weresere i'abesetojarãpɯ weedutise ni'i

¹ Acawererã, Õ'acũ yere wereri masã
musã tiropɯ bu'erã etacã, na weresere
“¿Diacjũta Õ'acũ ye nimitito?” ni i'aña.
Ãpẽrã Õ'acũ o'ó'cãrã nitima. Nipe'tirãpɯre
ẽjõpeoticã'ña. Na Espíritu Santure moomirã,
tojo nima'acã'bosama. A'ti ɯmɯcopɯre no'o
ɯaro nisoori masã nibi'acã'ma. “Õ'acũ yere
wererã wee'e”, ni bususijama. ² Musã na diacjũ
wererãrẽ a'tiro i'abeseya. Na “Jesucristo a'ti upɯ

me'rã bajuacu nimi”, nisama. Tojo ějõpeorã, Espíritu Santure cuorã nima. Narẽ ějõpeoya.
³ Āpērã tojo ějõpeotirã, Espíritu Santure mooma. Mejõ cūrẽ pe'sutima. Musã Jesucristore ĩ'atu'tigu cū a'tiatjere tu'otojapã. Na cū weronojõ nirã a'ti di'tapure nitojama.

⁴ Nisoori masã wātĩ yarã nima. Ō'acũ wātĩ nemorõ tutuami. Musã Ō'acũ yarã ni'i. Tojo weerã musã na ucũsere ějõpeoticārã niwũ.
⁵ Nisoori masã a'ti turicjārã a'ti umũco cjase dia'cūrẽ bu'esama. Na weronojõ nirãta na bu'esere tu'osama. ⁶ Marĩ pũrĩcã Ō'acũ pō'rã ni'i. Cū pō'rã nirã marĩ bu'esere tu'osama. Cū pō'rã nitirã tu'otisama. Tojo weerã marĩ diacjũ cjase ějõpeorārẽ, diacjũ nitisere ějõpeorārẽ ĩ'abesemasĩ'i. “Ā'rãta nima diacjũ cjasere ějõpeorã”, nĩmasĩ'i. “Na nima diacjũ cjasere ějõpeotirã”, ni ĩ'aducawaamasĩ'i.

Marĩrẽ a'merĩ ma'idutise ni'i

⁷⁻⁸ Acawererã, Ō'acũ masārẽ ma'imi. Tojo weerã marĩ quẽ'rã a'merĩ ma'irõua'a. A'merĩ mairãnojõ Ō'acũ pō'rã nima. Na Ō'acūrẽ masĩma. No'o ma'ise moorãnojõ Ō'acūrẽ ne masĩtima. ⁹ Cū marĩrẽ ma'isere ĩ'ogũ, cū macũ ni'cũ nigũrẽ a'ti turipure o'ócũ niwĩ. Marĩ catinu'cũatjere wéegũ tojo weecũ niwĩ. ¹⁰ Yu'u ma'isere ucũgũ, marĩ Ō'acūrẽ ma'isere ucũgũ mejẽta wee'e. Cū pe'e marĩrẽ ma'isere ucũgũ wee'e. Cū marĩrẽ ma'ígũ, marĩ ña'arõ wee'quere acobojodutigu cū macūrẽ o'ócũ niwĩ. Cū me'rã marĩ acobojose boca'a.

11 Acawererã, Õ'acũ marĩrẽ ma'icaronojõta marĩ quẽ'rã ãpẽrãrẽ ma'irõu'a. 12 A'ti umucopure ne ni'cũ Õ'acũrẽ ã'a'cu marĩmi. Marĩ cũrẽ ã'ati'cãrã nimirã, ãpẽrãrẽ ma'irã, cũ marĩpure nisere masĩ'i. Cũ marĩrẽ ma'ique ye bu'iri ãpẽrãrẽ queoro ma'ita basio'o. 13 Õ'acũ marĩrẽ Espĩritu Santure o'ocu niwĩ. Tojo weerã marĩ Õ'acũ marĩpure nisere masĩ'i. Marĩ quẽ'rã cũpureta ni'i. 14 Õ'acũ macũrẽ ãsã basuta ã'awũ. Cũrẽ a'ti turipure marĩ ãa'arõ wee nise-timi'cãrãrẽ yu'rũweticã weedutigũ o'ócu niwĩ. Tojo weerã musãrẽ a'tere were'e. 15 No'o nipe'tirã “Jesú Õ'acũ macũ nimi” nirãnojõ Õ'acũ me'rã nima. Cũ quẽ'rã napure nimi.

16 Õ'acũ marĩrẽ ma'isere masĩ'i. Cũ nipe'tirãrẽ ma'imi. No'o ãpẽrãrẽ maigũnojõ añurõ Õ'acũ me'rã nimi. Õ'acũ quẽ'rã cũ me'rã nimi. 17 Marĩ Õ'acũ me'rã nĩrã, queoro ma'imasĩ'i. Jesucristo a'ti turipũ nicã, cũ pacũ quẽ'rã cũ me'rã nicũ niwĩ. Cũ me'rã nĩ'caronojõta marĩ me'rã quẽ'rãrẽ Õ'acũ nimi. Tojo weerã marĩ a'ti turicjãrãrẽ beseatji nũmũ nicã, cũrẽ ne uisome. 18 A'merĩ mairã tirore uise marĩ'i. Uise cuorã tiro pe'ere ne a'merĩ ma'ise marĩ'i. Marĩ uise me'rã bu'iritirã weronojõ tu'oña'a. No'o uigũnojõ a'merĩ ma'imasĩtimi.

19 Õ'acũ marĩrẽ ma'imũ'tãcu niwĩ. Tojo weerã marĩ cũrẽ ma'ĩ'i. 20 Marĩ Õ'acũrẽ ma'imirã, ãpẽrãrẽ ã'atu'tirã, nisoosebucurã ni'i. Masã marĩ ã'arã waromarĩcãrẽ ma'itirã, nemorõ Õ'acũ bajutigũ pũrĩcãrẽ ma'ita basiotisa'a. 21 Jesucristo

marĩrẽ a'tiro dutiwĩ: “Õ'acũrẽ ma'írá, ãpẽrã quẽ'rãrẽ ma'irõua'a”, niwĩ.

5

Õ'acũ põ'rã nírá, ña'asere weeticã'rõua'a nise ni'i

¹ Nipe'tirá “Jesú Õ'acũ bese'cu nimi” ni ějõpeorãnoĵ Õ'acũ põ'rã nima. Āpẽrãrẽ ma'írá, na põ'rã quẽ'rãrẽ ma'irõua'a. ² Marĩ Õ'acũrẽ ma'í, cũ duti'quere wéerã, marĩ cũ põ'rãrẽ ma'í'i nisere masĩno'o. ³ Õ'acũrẽ ma'írá, cũ duti'quere weerã wee'e. Cũ dutise diasawe'e, weeta basiopũrĩcã'sa'a. ⁴ Marĩ Õ'acũ põ'rã a'ti turi cjase ña'asere weewe'e. Jesucristore ějõpeose me'rã añurõ weeta basio'o. ⁵ Marĩ Jesucristore “Õ'acũ macũ nimi”, ni ějõpeo'o. Te me'rã dia'cũ a'ti umuco cjase ña'asere cã'mota'amasĩsa'a.

Jesucristore “Õ'acũ macũ nimi” nise ni'i

⁶ Jesucristo Õ'acũ macũ nimi. Cũ a'ti turipũ nicã, Juã wãmeyeri masũ cũrẽ wãmeyewĩ. Cũrẽ wãmeyegũ, aco me'rã wãmeyewĩ. Be'ro cũ curusapũ wẽrĩwĩ. A'tiro weese me'rã cũ Õ'acũ macũ nisere ĩ'owĩ. Cũrẽ wãmeye'que me'rã dia'cũ ĩ'otiwĩ. Cũ wẽrĩse me'rã quẽ'rãrẽ ĩ'owĩ. Espíritu Santu Jesucristo Õ'acũ macũ nisere ĩ'omi. Cũta diacjũ cjasere weregũ nimi. ⁷ A'te quetire na basuta ĩ'oma. Na i'tiarã umusepũ nima: pacũ, macũ, tojo nicã Espíritu Santu. Ā'rã i'tiarãpũ ducawatimirã, ni'cũta nimi. ⁸ A'ti nucũcãpũre Espíritu Santu werese me'rã Jesú

Õ'acũ macũ nimi nisere masĩ'i. Tojo nicã Jesú cũ Õ'acũ macũ nisere cũ wãmeyeno'que me'rã, cũ wẽrĩ'que me'rã ĩ'ocu niwĩ. ⁹ Masã na ĩ'a'quere werecãmarĩcãrẽ, marĩ ějõpeo'o. Õ'acũ cũ macũ yere werecã pũrĩcãrẽ, nemorõ ějõpeoroũa'a. Cũ masã ucũse nemorõ queoro weremi. ¹⁰⁻¹² Õ'acũ marĩrẽ cũ macũ me'rã catinu'cũsere o'ocu niwĩ. Tojo weerã cũ macũrẽ ějõpeorã cũ me'rã catinu'cũrãsama. Cũ macũrẽ ějõpeotirã ne cũ me'rã catinu'cũsome. Marĩ Jesucristo ye quetire diacjũta ni'i nĩrã, cũrẽ ějõpeorã wee'e. Āpẽrã a'tere ějõpeotirãnojõ “Õ'acũ nisoogu nimi”, nĩrã weema.

Juã werecasa'que ni'i

¹³ Musã Õ'acũ macũrẽ ějõpeorãrẽ tere ojapũ. Musã catinu'cũrãsaa nisere masĩato nĩgũ tojo ojapũ.

¹⁴ Marĩ masĩ'i, Õ'acũ cũ ɥaranojõ marĩ sẽrĩcã, marĩ sẽrĩsere tũ'osami. “Marĩ sẽrĩsere tũ'osami” ni masĩrã, cũrẽ uise marĩrõ sẽrĩmasĩ'i. ¹⁵ “Õ'acũ marĩ sẽrĩsere tũ'osami” ni masĩrõnojõta “Cũ marĩ sẽrĩ'que quẽ'rãrẽ o'otojami”, nino'o.

¹⁶ Apetero Jesucristore ějõpeogu ña'arõ weesami. Cũ tojo weecã ĩ'arã, Õ'acũrẽ sẽrĩbosaya. Marĩ sẽrĩbosacã, Õ'acũ yũ'tigusami. Cũrẽ ducayugusami tja. Apeye pũrĩcã ña'abutiario weese ni'i. Téma “Sẽrĩbosaya” niña marĩ'i. Tere weerã Õ'acũ tiropũ wa'asome.

¹⁷ Nipe'tise ña'ase Õ'acũrẽ yũ'rũnũ'cãse ni'i. Yũ'u nĩrõnojõta apeye ña'arõ weesere Õ'acũ

acobojojogusami. Apeye ña'abutiario weesere acobojosome.

¹⁸ Marĩ masĩ'i, Õ'acũ pō'rārē Jesucristo añurō co'tenu'cũcã'mi. Tojo weerã na ña'arō weenu'cũtisama. Wãtĩ quẽ'rã Jesucristo co'teyucã, narē ña'arō weemasĩtisami.

¹⁹ Marĩ Õ'acũ pō'rã nisere, tojo nicã wãtĩ nipe'tiro a'ti turicjãrã wiogũ nimi nisere masĩ'i.

²⁰ Apeye quẽ'rārē, Õ'acũ macũ cã a'ti'quere masĩ'i. Cũ marĩrē Õ'acũ diacjũ nigũrē masĩdutigũ tũ'omasĩse o'ocũ niwĩ. Marĩ Jesucristo me'rã nĩrã, cã pacũ Õ'acũpureta ni'i. Jesucristo Õ'acũ nimi. Cũta catinu'cũgũ marĩ catinu'cũatjere o'omi. ²¹ Apeye, masã na queose yee ějõpeo'quenojõrē ějõpeoticã'ña. Õ'acũ se'sarore ějõpeoya. Nipe'tise apeyenojõ yũ'rũoro Õ'acũrē ma'iña.

Tojota weeroũasa'a.

Tocã'rõta oja'a.

Juã

Õ'âkã hi yeere uúkũri turi Tukano New Testament in Tucano (BR:tuo:Tucano)

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 11 Nov 2022 from source
files dated 9 Oct 2020

00ebd04f-7b0d-5a72-9407-eb53ae2bd086